

KHUTBAH JUMAAT

“MEMANFAATKAN NIKMAT MASA”
(13 November 2020M/ 27 Rabiulawal 1442H)

الْحَمْدُ لِلَّهِ، الْحَمْدُ لِلَّهِ عَلَى إِحْسَانِهِ، وَالشُّكْرُ لَهُ عَلَى تَوْفِيقِهِ
وَأَمْتِنَانِهِ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِسَانِهِ،
وَأَشْهَدُ أَنَّ سَيِّدَنَا وَنَبِيَّنَا مُحَمَّدًا عَبْدُهُ وَرَسُولُهُ الدَّاعِي إِلَى رِضْوَانِهِ.
اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ
وَإِخْوَانِهِ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ
مُسْلِمُونَ.

قَالَ اللَّهُ تَعَالَى فِي كِتَابِهِ الْعَزِيزِ :

يَتَأْتِيهَا الَّذِينَ ءَامَنُوا لَا تُلْهِكُمْ أَمْوَالُكُمْ وَلَا أَوْلَادُكُمْ عَنْ ذِكْرِ اللَّهِ وَمَنْ
يَفْعَلْ ذَلِكَ فَأُولَئِكَ هُمُ الْخَاسِرُونَ ﴿٩﴾

Maksudnya : *Wahai orang-orang yang beriman! Janganlah kamu dilalaikan oleh (urusan) harta benda kamu dan anak-pinak kamu daripada mengingati Allah (dengan menjalankan perintahNya). Dan (ingatlah), sesiapa yang melakukan demikian, maka mereka itulah orang-orang yang rugi.*

(Surah al-Munafiqun, ayat 9)

Kaum muslimin yang dirahmati Allah,

Marilah kita bersama-sama meningkatkan ketaqwaan kepada Allah *subhanahu wata'ala* dengan menunaikan segala perintah-Nya dan meninggalkan segala larangan-Nya. Semoga kita beroleh kejayaan, kebahagiaan dan keselamatan di dunia dan di akhirat. Marilah kita bersama-sama mendengar dan menghayati khutbah yang bertajuk : ***“Memanfaatkan Nikmat Masa”***.

Kaum muslimin yang dirahmati Allah,

Antara panduan daripada Allah *subhanahu wata'ala* untuk kita terapkan dalam kehidupan kita ialah menjaga masa. Sesungguhnya masa adalah sesuatu anugerah Allah *subhanahu wata'ala* yang berterusan untuk semua makhluk-Nya. Apabila seorang hamba itu memanfaatkan masanya, Allah *subhanahu wata'ala* menjanjikan ganjaran buatnya dan begitu juga sebaliknya. Firman Allah *subhanahu wata'ala* dalam sebuah hadith qudsi yang bermaksud:

“Wahai anak Adam! Lapangkanlah untuk beribadah kepada-Ku, nescaya Akuenuhi hatimu dengan rasa cukup dan Aku memenuhi kekuranganmu. Dan Jika kamu tidak lakukan, nescaya Akuenuhi tanganmu dengan kesibukan dan tidak Akuenuhi kekuranganmu.”

(Hadith riwayat Imam Ahmad, Imam at-Tirmizi, dan Imam Ibn Majah)

Hadith tadi memberi pengajaran kepada kita, akan janji Allah *subhanahu wata'ala* kepada hamba-hamba-Nya yang memanfaatkan masanya. Adalah penting baginya untuk

memanfaatkan nikmat masa itu untuk semua amalan yang direndah-Nya. Namun, sekiranya beliau menia-siakan anugerah masa ini, beliau akan disibukkan dengan urusannya, sehinggakan beliau tidak akan pernah merasa cukup dengan masa yang ada.

Alangkah ruginya apabila seseorang itu berdiri di hadapan Allah *subhanahu wata'ala* di akhirat kelak, tiada bersamanya sebarang bekalan melainkan pahala yang sedikit, dan dosa yang menggunung.

Kaum muslimin yang dirahmati Allah,

Kita perlu memanfaatkan masa kita di dunia ini dengan sebaik mungkin. Firman Allah *subhanahu wata'ala* di dalam surah al-'Asr, ayat 1-3 yang bermaksud:

“Demi masa! Sesungguhnya, manusia itu dalam kerugian. Kecuali orang-orang yang beriman dan beramal soleh, dan mereka pula berpesan-pesan dengan kebenaran serta berpesan-pesan dengan sabar..”

Surah yang sangat ringkas, tetapi sangat padat dengan panduan dan sangat luas dengan makna. Dalamnya terkandung empat pengajaran utama yang perlu kita beri perhatian agar kita tidak menjadi orang yang rugi di dunia dan akhirat.

Pertama: Kita perlu menerapkan dalam diri kita keimanan yang jitu. Apakah itu keimanan yang jitu? Iaitu beriman sepenuhnya dengan qada' dan qadar Allah *subhanahu wata'ala*. Oleh kerana kita tidak tahu apakah qada' dan qadar Allah *subhanahu wata'ala*

untuk kita, maka kita perlu berusaha sepenuhnya dan tidak bermalas-malasan dalam kehidupan kita ini. Kita perlu merancang kehidupan kita dengan teliti, dan bukan dengan menghanyutkan kehidupan kita pada arus kehidupan, bak kapal yang tidak dikemudikan dengan baik. Perancangan adalah kunci kejayaan. Orang yang gagal merancang, bermakna dia rancang untuk gagal.

Kedua: Berkaitan penerimaan. Keimanan kepada qada' dan qadar juga menjadikan kita reda menerima keputusan yang telah ditetapkan oleh Allah *subhanahu wata'ala* walaupun kita merancang sebaliknya. Kita tidak akan rasa dukacita dan putus asa atas kegagalan. Sebaliknya, kita akan menjadikan kegagalan itu pemacu kepada kejayaan. Kita belajar daripada kesilapan. Begitu juga, kita tidak akan terlalu gembira dengan kejayaan yang telah Allah *subhanahu wata'ala* kurniakan. Sebaliknya, kita belajar apakah faktor-faktor yang mendorong kejayaan tersebut. Inilah resepi kegemilangan dalam kehidupan dunia dan akhirat. Natijah daripada keimanan yang jitu.

Ketiga: Penumpuan kepada amal soleh. Selain dari memperkukuhkan keimanan kita, kita juga perlu memberikan tumpuan kepada amal soleh kita. Tiada gunanya kita berjaya dalam kehidupan ini, dengan harta yang banyak, pangkat kedudukan yang tinggi, dihormati dan disanjung manusia. Tetapi apabila berdiri di hadapan Allah, kita berdiri dengan amalan yang sedikit, mengundang kemurkaan Allah *subhanahu wata'ala*,

dipandang hina oleh semua manusia di Padang Mahsyar kelak. Oleh itu, pentingnya kita isikan masa dengan amal-amal soleh. Agar kita tidak rugi di akhirat nanti.

Keempat: Saling nasihat menasihati. Ia merupakan antara amalan soleh yang perlu kita usahakan. Ini yang dimaksudkan dalam surah Al-Asr tadi, iaitu berpesan-pesan kepada kebenaran. Pastikan nasihat dan ajakan kita kepada kebenaran dihiasai dengan penuh hikmah dan akhlak yang mulia. Ingatlah akan sabda Nabi *sallallahu alaihi wasallam* yang bermaksud:

((Sesungguhnya agama itu mudah, janganlah seseorang daripada kamu menyukarkan (menyulitkan urusan agama itu) melainkan kamu akan tewas.))

(Hadith riwayat Imam al-Bukhari)

Selain itu, antara amal soleh yang boleh kita laksanakan adalah menasihati orang yang ditimpa musibah, sedang kecewa, atau sedang marah untuk bersabar. Setiap sesuatu yang berlaku pastinya terdapat hikmah dan pengajaran di sebaliknya. Kita perlu lalunya dengan ketenangan dalam usaha mencapai kejayaan pada masa hadapan. Inilah empat perkara yang perlu kita berikan penumpuan dalam kehidupan ini agar kita dapat memanfaatkan masa kita dengan sebaik yang mungkin.

Kaum muslimin yang dirahmati Allah,

Surah Al-'Asr yang pendek tetapi mendalam maknanya itu merupakan satu surah yang kerap dibaca oleh para

sahabat *radiyallahu anhum* sebagai penutup bagi setiap pertemuan. Kerana surah ini mengajar kita untuk menghargai masa dan untuk memanfaatkan masa yang ada.

Semoga dengan kita menerapkan empat pengajaran yang dinyatakan tadi dalam kehidupan ini, kita akan dapat memanfaatkan masa kita yang singkat di dunia ini. Dan semoga Allah *subhanahu wata'ala* tidak memasukkan kita ke dalam golongan mereka yang rugi.

Akhirnya, marilah kita bersama-sama menghayati firman Allah *subhanahu wata'ala* dalam Surah Aali Imran, ayat 140:

أَعُوذُ بِاللَّهِ مِنَ الشَّيْطَانِ الرَّجِيمِ
إِنْ يَمَسُّكُمْ قَرْحٌ فَقَدْ مَسَّ الْقَوْمَ قَرْحٌ مِّثْلُهُ وَتِلْكَ الْأَيَّامُ
نُذِرُ لَهَا بَيْنَ النَّاسِ وَلِيَعْلَمَ اللَّهُ الَّذِينَ ءَامَنُوا وَيَتَّخِذَ مِنْكُمْ شُهَدَاءَ
وَاللَّهُ لَا يُحِبُّ الظَّالِمِينَ ﴿١٤٠﴾

Maksudnya: *Jika kamu (dalam peperangan Uhud) mendapat luka (tercedera), maka sesungguhnya kaum (musyrik yang mencerobohi kamu) itu telah (tercedera juga dan) mendaapat luka yang sama (dalam peperangan Badar). Dan demikian itulah keadaan hari-hari (dunia ini dengan peristiwa-peristiwa kemenangan atau kekalahan), kami gilirkan dia antara sesama manusia, (supaya menjadi pengajaran) dan supaya nyata apa yang diketahui Allah tentang orang-orang yang tetap beriman (dan yang sebaliknya), dan juga*

supaya Allah menjadikan sebahagian di antara kamu orang-orang yang mati Syahid. Dan (ingatlah), Allah tidak suka kepada orang-orang yang zalim.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ
الْعَلِيمُ. أَقُولُ قَوْلِي هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ
الْغَفُورُ الرَّحِيمُ.

KHUTBAH JUMAAT KEDUA

الْحَمْدُ لِلَّهِ. الْحَمْدُ لِلَّهِ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ
وَخَدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ
صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا
بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ لَعَلَّكُمْ تُفْلِحُونَ. قَالَ اللَّهُ
تَعَالَى:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ
وَسَلِّمُوا تَسْلِيمًا ﴿٥٦﴾

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ
مِنْهُمْ وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ وَيَا قَاضِيَ
الْحَاجَاتِ.

Ya Allah, ampunilah dosa-dosa dan kesalahan kami, ibubapa kami, ahli keluarga dan guru-guru kami. Limpahkanlah kesejahteraan, kedamaian dan kebahagiaan kepada kami semua dalam kehidupan di dunia dan di akhirat.

Ya Allah ! Ya Rahman ! Ya Rahim! Berikanlah taufiq dan hidayat-Mu kepada kami semua dan juga kepada pemimpin-pemimpin Negara kami, khasnya kepada Seri Paduka Baginda Yang di-Pertuan Agong Malaysia, dan juga pemimpin-pemimpin negeri

kami, khususnya Tuan Yang Terutama Yang di-Pertua Negeri Sarawak.

Ya Allah, Ya Dzal Jalali Wal Ikram! Kabulkanlah doa kami. Terimalah segala amal ibadah dan ketaatan kami kepada-Mu. Ya Allah, limpahkanlah ke atas kami nikmat kesihatan dan keafiatan, kurniakanlah kesembuhan kepada mereka yang diuji dengan penyakit-penyakit dan bebaskanlah negara kami daripada segala perkara yang tidak diingini dan wabak penyakit, khususnya wabak COVID 19. Menangkanlah kami dalam memerangnya.

رَبَّنَا أُنْتَنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. أَمِينَ،
أَمِينَ يَا رَبَّ الْعَالَمِينَ.

عِبَادَ اللَّهِ. إِنَّ اللَّهَ يَأْمُرُ بِالْعَدْلِ وَالْإِحْسَانِ. وَإِيتَاءِ ذِي الْقُرْبَىٰ وَيَنْهَىٰ
عَنِ الْفَحْشَاءِ وَالْمُنْكَرِ وَالْبَغْيِ. يَعِظُكُمْ لَعَلَّكُمْ تَذَكَّرُونَ. فَادْكُرُوا اللَّهَ
الْعَظِيمَ يَذْكُرْكُمْ. وَاشْكُرُوهُ عَلَىٰ نِعْمِهِ يَزِدْكُمْ. وَاسْأَلُوهُ مِنْ فَضْلِهِ
يُعْطِكُمْ. وَلَذِكْرُ اللَّهِ أَكْبَرُ. وَاللَّهُ يَعْلَمُ مَا تَصْنَعُونَ. أَقِيمُوا الصَّلَاةَ.